

61532/P

DISSERTATIO MEDICA
INAUGURALIS,
DE

CATARRHO.

QUAM,

ANNUENTE SUMMO NUMINE,

Ex Auctoritate Reverendi admodum Viri,

GULIELMI ROBERTSON, S. S. T. P.

ACADEMIÆ EDINBURGENÆ PRÆFECTI;

NEC NON

Amplissimi SENATUS ACADEMICI consensu,

Et nobilissimæ FACULTATIS MEDICÆ decreto;

PRO GRADU DOCTORATUS,

SUMMISQUE IN MEDICINA HONORIBUS ET PRIVILEGIIS

RITE ET LEGITIME CONSEQUENDIS;

Eruditorum examini subjicit

JOANNES GOVAN, A. M.

BRITANNUS,

Ad diem 12. Junii, hora locoque solitis.

—————*periturae parcite chartae.* HOR.

EDINBURGI:

Apud BALFOUR et SMELLIE,

Academiae Typographos.

—————
M, DCC, LXXII.

W. Leggettwood

from his most obed^t. serv^t.

The Author



316867

Juveni amico

G U L I E L M O A L E X A N D E R,

Sibi longa familiaritate charo,

In testimonium

Eximiae Spei

Quam laetus fovet,

Illum,


Familiae, Amicis, ac Patriae,

Decori quandoque futurum,

Hancce Dissertationem

Inscribi voluit

A U C T O R.



DISSERTATIO MEDICA

DE

CATARRHO.

NULLA, fortasse, orbis terrarum regio, morbo quocunque per populos grassante, magis vexatur, quam Britannia catarrhis. Morbus equidem adeo levis plerumque est, ut ope medica indignus vulgo censeatur; periculi autem expertem nemo crediderit, qui, disciplina medica vel leviter imbutus, noverit, morborum infidiosissimo, phthisi nempe pulmonali, quae, Insulae nostrae incolas, prae aliis, adgreditur jugulatque, catarrhos saepissime viam sternere.

QUUM, igitur, talis sit catarrhus, quum tam frequenter recurrat, tamque funeste haud raro terminetur, summam attentionem honores medicos in Britannia petentium jure sibi vindicare videtur.

A

QUA-

QUAPROPTER, dum almae hujus Univer-
sitatis legibus morem gerere adgredior, quae-
dam de hujus morbi natura et curatione pro-
ponere statui.

D E F I N I T I O.

PER catarrhum intelligitur, muci ex glan-
dulis membranae narium, faucium, et bron-
chiorum excretio solito major, vel saltem
hujus excretionis molimina, cum pulsu fre-
quente, et corporis calore aucto.

H I S T O R I A M O R B I.

Hic morbus febris instar inflammatoriae
communis incipit; horrore, nempe, frigori-
busque et caloribus alternis. Ex aura fri-
gidiuscula sensu frigoris molestimo afficitur
aeger. Dolet caput; gravantur oculi, inso-
litaque lachrymarum copia suffunduntur. In-
farcti nares aerem transmittere nequeunt,
dum

dum humor tenuis jugiter exinde defluit. Sternutatione quoque frequenti laboratur, saepiusque et raucedine. Ingruit et tussis, plerumque sub initio sicca, sonora.

NONNUNQUAM et guttur calore afficitur insolito, et rubescunt fauces, cum parva deglutiendi difficultate, aliisque levioris anginae symptomatibus.

ALVUS fere semper adstringitur; nonnunquam tamen, sed rarius, adest diarrhoea. Urina rubet, solitoque saepius redditur, et minori copia.

VESPERASCENTE die, exacerbationem passa febris, somnum per noctem aegro adimit.

SANGUIS tunc temporis missus, crustam coriaceam albidam in superficie ostendit.

NEQUE ventriculi status silentio praeter-eundus est: Quum enim in aliis morbis febrilibus omnino prosternatur appetitus, in febre catarrhali nonnunquam supra solitum augetur. Hoc autem de morbi initio tantum intelligendum est: Brevi enim turbantur
et

et organa digestionis, suisque muneribus fungi nequeunt.

D I A G N O S I S.

Ex symptomatibus recensitis, perfacilis est catarrhi diagnosis, prioribusque rite perspectis, ab omni alio morbo facile discerni potest, rubeola tantum tussique convulsiva incipientibus exceptis.

Quod ad rubeolam attinet, primo stadio, febrem catarrhalem ita ad amissim refert, ut, ni aegrum rubeola olim laborasse certiores simus, nulla certa sit morborum distinctio, donec, paucis interjectis diebus, exanthematum eruptio rem extra dubitationem ponat.

Forsan et in rubeola major plerumque adest systematis irritabilitas, majorque praecedit anxietas, uti solet in febribus cum eruptione stipatis, priusquam appareant maculae.

IN tussi convulsiva quoque, symptomatum similitudo similis in diagnosi difficultatis causa est; ita ut, nisi notum fuerit, aegrum jam semel tussi convulsiva affectum fuisse, expectandus erit, ad morbum dignoscendum, modus inspirationis, tussi convulsivae proprius, quique haud raro non, nisi longiore temporis intervallo, sese monstrare incipit.

PRAETER has difficultates, quae morbi incipientis diagnosin respiciunt, restat insuper alia in ejus decursu; quando enim catarrhus solutionem benignam intra solitum tempus non admiserit, talis saepe est ejus cum phthisi pulmonali nexus, ut vix invicem distingui queant morbi: Phthisis saltem hisce regionibus frequentissima, nihil aliud quam catarrhi status provectior, in omni fere casu, cenferi potest; quippe incerti sunt utriusque morbi limites; nec ulla obtinet determinata separationis linea; sed ibi incipit phthisis, ubi definit catarrhus.

QUUM autem maximi sit momenti, hos affines morbos accurate distinguere, signa
praecipua

praecipua diagnostica hic breviter adtingere, haud abs re esse videtur.

CATARRHUM igitur in phthisin transiisse, sequentibus potissimum indiciis iudicamus.

SI ultra paucas septimanas perduraverit morbus, praesertim si nec ineunte aestate recesserit; si tussis, initio sonora, in tussiculam obscuriorem abierit, quaeque ex irritatione profundiore nata videatur, et post pastrum praecipue molesta; si dyspnoea, ad minimum corporis motum aucta, vexat; si dolor punctorius in thorace per sentitur, cum quodam titillationis sensu ad fauces; si in utrumque latus decumbere nequeat aeger; si, demum, febre hectica afficitur, cum pulsu frequentiore, sed molli et undoso, siti fere perpetua, licet lingua sordibus pura prorsus et nitida sit; sudoribus per noctem profusis, circa caput praecipue et thoracem; labiorum, genarum, et caruncularum lachrymalium, rubore roseo, miraque tunicae oculi albugi-
neae

neae pelluciditate ; atque totius denique corporis tabe lenta, vocisque mutatione : Talis symptomatum concursus, febrem excipiens catarrhalem, phthysicos jam inceptae vix ullum relinquit dubium ; praesertim si vel labe quadam hereditaria, vel mala thoracis conformatione, vel pulmonum debilitate, quomodocunque inducta, huic morbo idoneus fit aeger.

P R O G N O S I S.

IN genere, morbus de quo agitur periculi pene expers est, paucorumque dierum spatio solvitur, modo aeger, haud vulgaria, ut saepe fit, temnens, morbo incipienti occurrerit.

FELICIS terminationis signa sunt : Respiratio libera ; sputa cum tussi liberius excreata ; mucus e naribus stillans spissior blandiorque ; circa os, denique, et nares, pustularum rubrarum eruptio.

Ex

Ex altera parte, infausti est ominis, quando magnopere faeviunt symptomata febrilia; quod, five ex morbo sub initio neglecto, five imperite tractato, nonnunquam accidit.

IMMINET praeterea periculum, si respiratio difficilis fit: Neque nullum adest discrimen e tussis violentia, qua magis magisque accenditur febris.

SED nihil aequè pertimescendum est ac strictura circa praecordia, dolorve in thorace fixus, acutus: Haec enim symptomata aut peripneumoniae supervenientis signa sunt, aut tuberculum in pulmonibus ortum indicant, ex quo in proclivi est phthisis pulmonalis.

C A U S A E M O R B I.

I. *Causae praedisponentes.* Ut constat, catarrhos phthisi pulmonali praedispositis maxime periculosos esse, sic quoque hos, prae caeteris, adgrediuntur. A molliore ac
delicatiore

delicatiore corporis habitu, cui phthifica labes semper adhaeret, hoc sequi videtur: Quosque enim debiliores, licet phthifico vitio nequaquam infectos, catarrhis aptissimos esse, multiplici constat experientia.

CONGENITA quandoque videtur, quae huic morbo favet, debilitas; ut plurimum tamen erroribus quibusdam in vitae regimine debetur. Hujusmodi sunt, corpus minus justo exercere; nimis domi degere; inque cubiculis quae ignibus focariis calent sese continere; nimiumque laute vivere. Has ob causas, infantes foeminaeque hoc morbo saepissime corripuntur. Hinc quoque, nobiles ordinesque excelsiores, vitae genere molli et otioso, hujus morbi incurfionibus sese aptos reddunt; dum vulgus hominum, laboribus durum, nec luxu fractum, morbum fere ignorat.

ET hic, liquorum fermentatorum effectus minime praeterire possumus. Hi enim, nimia quantitate sumpti, certissime ad hunc morbum praedisponunt. Ut de vino tantum dicam, quo nihil fortasse, sive per se gratius,

five ad usum praestantius, aegris mortalibus munere conceditur divino; quid duris hisce plagis septentrionalibus modico ejus usu salubrius? Vi sua tonica et stimulante, corpora ad coelorum inclementiam tolerandam roborat firmatque; idemque, laborum dulce lenimen, animos ipsos, coelo nubiloso, cheu! nimium affectos, mire reficit et exhilarat.

DUM autem succo vere nobili suam tribuimus laudem, nullo modo dissimulandum est, quam pessimos effectus ex ejus abusu sequi. Varia ebrietatis mala hujus loci non est recensere. Ad propositum nostrum observasse sufficiat, liquorum spirituosorum vel fermentatorum usum immodicum, quamquam prima operatione systema stimulet, vimque nervosam excitet, brevi tamen relaxationem quam maximam inducere. Hinc, etiamsi, ex largiore vini potatione, systematis nervosi excitatio novas corpori vires addere videatur, ita ut causis, morbo inducendo alioquin idoneis, resistere par sit; breviter tamen finitur paroxysmus, eique succedit vis nerveae collapsus, viriumque systematis, modo

do supra naturam auctarum, resolutio et prostratio, quae febris catarrhalis productioni adeo favet, ut, ex causis externis, etiam levioribus quam quae per se ei inducendo aptae essent, statim nascatur morbus.

SI id genus liquores potantur calidi, multaque tepida diluti, quanto majorem relaxationem atque debilitatem eorum usu inducitur, tanto magis, sub hac forma, nimia pocula nocent, febribusque catarrhalibus homines obnoxiores reddunt.

DORMIENTES quoque hujus morbi causis externis opportuniore sunt quam vigilantes, ob similes, ut videtur, rationes.

EODEM, denique, conducunt evacuationes praegraves, animique pathemata tristia.

II. *Causae procatarticae.* Hae ad tria capita generaliora referri possunt.

Imo, FRIGORIS ad corpus applicatio.

NULLUS equidem frigoris gradus, quantumvis intensus, morbum per se inducere potest. Ita enim a Natura fabricata sunt corpora humana, ut caloris varietates, vel in locis maxime diffitis, absque incommodo tollerare

lerare queant: Neque Poli Arctici incolae catarrhis magis subiecti forent, quam qui sub Zona Torrida degunt, si illis frigora aeque ac his calores constantes essent.

SUBITÆ frigoris calorisque vicissitudines solae nocent, hujusque morbi causae praecipuae censendae sunt.

HINC apud nos maxime grassatur morbus, dum mutabilis variaque coeli temperies. Hinc etiam imminens morbi periculum ex subita frigoris applicatione, dum exercitio vehementiore, aliove quovis modo, nimis calefactum est corpus. Et hinc, demum, catarrhorum in hyeme frequentia: Crebrae enim, ea tempestate, coeli mutabilitatis ratione posthabita, ex sola aeris, in domibus, ignibus focariis calefactis, atmosphaeraeque externae temperie longe diversa, necesse est ut saepe oriatur morbus.

2do, HUMIDITAS, praesertim cum frigore conjuncta, morbi occasionem persaepe praebet. Testantur catarrhi frequentes ex aeris crassitudine aquosa, ex vestimentis madidis, et potissimum ex pedum humectatione ;

one; quae omnia, vulgari experientia confirmata, longiore illustratione nequaquam egent.

3tio, NONNE et contagio inter causas catarrhi occasionales recensenda venit? Sunt certe quae fuadent. Inter alia, morbus *Influenzae* nomine celeberrimus, qui jam ter quaterve, intra hominum memoriam, totam fere Europam, Africam, et Americam, epidemice pergrassatus est, quique catarrhi symptomatibus stipatus fuisse videtur.

III. *Causa proxima.* Symptomata supra recensita, auctam fluidorum determinationem, membranam versus Schneiderianam, cum ejus membranae plus minus inflammatione, plane monstrant. Nullus ergo dubitandi locus est de morbida systematis affectione, cui proxime referenda sunt phaenomena.

CAUSARUM attamen quas memoravimus actio, earumque operationis investigatio propior, quove modo talem huic membranae mutationem inducant, quum sensibus magis latet, ad difficiliora ducere necesse est.

SUNT

SUNT qui per materiem morbigicam, five foris admotam, five in corpore ipfo generatam, rem explicare volunt.

PRIORI opinioni favet natura morbi contagiofa, quae materiem quandam morbigicam, ex aeris ftatu pendentem, in corpus introductam, fuadere videtur.

ACRIMONIA, intus nata, ex materie perfpirabili obftructa originem ducere creditur. Humorū pars corrupta, quaeque in acrimoniam putridam jam vergit, per cutaneam perfpirationem expurgatur et ejicitur. Quando, igitur, vafa exhalantia, in corporis fuperficie, vi atmofphaerae frigidae humidaeque arctantur, quo multum conducit fystematis, ex caufis quibufcunque, ftatus debilior, hosce humores aliorum converti neceffe eft; quumque acrimonia, ut dictum eft, praediti funt, febrem producere, five partibus, ad quas forte feruntur, irritationem et inflammationem inducendo, five fluida univerfa inficiendo, haud abfonum eſſe dicitur.

NONNE,

NONNE autem sola circulationis, ex causis antedictis, mutatio, internaque fluidorum determinatio, morbi phaenomena fat explicat? Quid, igitur, ad materiem mor- bificam, naturae prorsus ignotae, nulloque experimento detegendam, confugere co- git?

VARIA insuper obstant, quo minus, acrimoniam in systemate a perspiratione impedita unquam generari, credatur: Sic, ut alia omittam, saepe, sine ullo tali incom- modo, non solum impeditur perspiratio, sed et aliae in corpore humano secretiones multo magis ad acrimoniam generandam i- doneae retinentur.

IMMO, et de acri foris admoto, jure du- bitari possit: Quum adhuc nimis raro per contagionem communicari visus sit morbus, quam, ut certa inde deduci possit ratiocinatio.

SUPEREST et alia, hac de re, haud facile solvenda quaestio. Quaeritur, nempe, quamobrem, ex causis externis modo enar- ratis, membrana Schneideriana, prae alia quavis corporis parte interna, morbo afficia- tur?

tur? Quandoque, revera, ex partium situ peti potest hujus rei ratio. Haec enim membrana, cavum narium, fauces, tracheam, aliasque qua spiritus meat partes, investiens, aeris frigidi stimulo facile irritari potest. Quum tamen topicus partis affectae stimulus nonnunquam admitti nequeat, velut, si ex pedum humectatione ortus fuerit morbus, rem mihi omnino inexplicabilem videri, ingenue fateor.

PIGET, fane, medicorum ratiocinationes, circa causas morborum proximas, ejusmodi dubiis tam saepe premi. Sed reputandum est, magis semper interesse, scire quid sit, quam quomodo fiat. Nec, mehercule, est cur artem medicam conjecturis tantum fultam esse, nullisque certis gaudere principiis, ideo crederetur. Cum aliis etenim scientiis hoc commune habet medicina: Quae enim sua obscura et incerta non agnoscit? Triste, revera, solatium praebet communis illa humanarum scientiarum fors; sed opprobria saltem arti nostrae ab obtrectatoribus integra valetudine

ne

ne gaudentibus invec̃ta, refellit. Sed ad rem tandem redeamus.

SYMPTOMATUM RATIO.

MEMBRANAM Schneiderianam, morbi sedem esse, supra positum est : Nunc tantum restat, ut, ex ejus conditione morbosa, variorum symptomatum ratio deducatur.

SINGULA morbi phaenomena recensere, et fusius explicare, nimis longum foret, nec operae pretium : Sequentia tantum, et leviter, adtingere sufficiat.

MUCI excretio aucta, ex glandulis quibus undique scatet membrana, nimia vaporum distensione irritatis, plane pendet.

HUIUS quoque distensioni, quae tumorem partis inflammatorium efficit, recte ascribuntur, et narium infarctio, et capitis dolor gravativus, atque humoris lachrymalis fluxus.

C

EADEM

EADEM est et sternutationis causa; hanc enim ex irritatione quadam in naribus nata oriri constat.

RAUCEDINIS etiam simplex est ratio; nam si, ut docent anatomici, vox clara a glottidis, cartilaginum laryngis, partiumque vicinarum tremoribus pendet, necessario sequitur, ut, amissa vi partium vibrabili, sive ex inflammatione vicina, sive ex muco nimia copia obducto, vox vel rauca vel nulla reddatur.

TUSSIS, vel ex muco congesto, aliave causa, membranam asperae arteriae interiorem irritante, oritur. Nam, cum haec membrana stimuli impatientissima sit, musculos respirationis in contractionem cogit, quo expellatur causa molesta.

APPETITUS, sub initio morbi, nonnunquam solito major adest, e stimulo fortasse usque ad ventriculum communicato, ejusque tonum, pro tempore, augente; brevi autem, inducta relaxatione, ut fere fit, e nimia stimuli diuturnitate, atque ventriculo
colluvie

colluvie mucosa gravato, prostermitur omnino appetitus.

DE aliis morbi symptomatibus, quae vel omni febris communia sunt, vel inflammationi topicae propria, hic speciatim agere, supervacaneum foret.

M O R B I C U R A T I O.

AD alteram itaque propositi partem, quae morbi curationem spectat, jam transeo: Atque hic agendum est,

1mo, DE PROPHYLAXI.

2do, DE METHODO MEDENDI.

P R O P H Y L A X I S.

PRIUSQUAM ad ea quibus sanari potest praefens catarrhus progrediamur, nonnulla de iis quae morbo praeveniendo inserviunt praemittere,

praemittere, haud inutile videtur; mihi enim persuasissimum est, quod, si rite instituere-
tur prophylaxis, multo minus frequentes,
apud nostrates, forent catarrhi.

HAUD equidem ignoro, climatis nostri
inconstantiam, tempestatisque magnas subi-
tasque varietates, hujus morbi productioni
quam maxime favere. Ex perspecta ta-
men in operibus Naturae benevolentia con-
cluderem, quod, cum nos in plagis durioribus
collocaverit Alma Rerum Parens, coelumque
dederit varium et mutabile, corpora simul
robustiora concesserit, aliaque benigniter lar-
gita sit, quibus atmosphaerae potestatibus no-
civis, aliisque ex situ noxis, facilius resistere-
mus.

TALIBUS ex analogia ductis ratio-
cinationibus consentit certe experientia.
Unde igitur, si ita se res habeat, tanta
catarrhorum inter Britannos frequentia?
Patet responsio: Ipsi in culpa sumus. Ne-
que repugnat, hos praeceteris catarrhis ob-
noxios esse, qui morbo praecavendo toti
incumbunt. Haec ipsa, mehercule, prima
labes

labes mali; nec ulla catarrhorum causa uberior existit, quam praxis praepostera prorsus atque absurda circa morbi prophylaxin.

CATARRHOS a frigore ac humiditate corpori applicatis nasci, quotidiana docet experientia. Hinc quam perperam vulgo ratiocinantur homines, quod, quo plus sese domi contineant, ubi aer vi focorum calet, tanto minus hoc morbo laborabunt! Si quidem eo usque pervenire possemus, ut aëris ambientis temperies a gradu quodam determinato nunquam variaret, morbum sic penitus arceri posse, nequaquam recuso. Sed repugnant naturae humanae fors, vitaeque civilis ratio. Qui, sub coelo Britannico, causas catarrhorum externas data opera refugiunt, hoc tantum agunt, ut iisdem magis opportuni fiant; quicunque ergo rem plane ineptam molitur, certo periculo sese involvit.

ALIA igitur quaerenda est methodus, quae conditioni nostrae magis conveniat.

ET

ET hic constat, quod, si quavis arte corpora nostra in eum statum inducere possemus, ut causis morbi externis resistere queant, perinde esset ad morbum praecavendum, ac si istiusmodi causae nunquam existerent. Atque haec vera est morbi prophylaxis, quae, vitae muniis nequaquam repugnans, omnibus patet; quaeque, si recte institueretur, etiam si morbum haud semper praecideret, hoc saltem sine dubio efficeret, ut Britannos prae aliis Europae populis nequaquam invaderet.

Quo Naturae consiliis in prophylaxi instituenda obsequamur, sequentia potissimum, quae et ratio suadet, et experientia confirmat, diligenter observanda sunt.

Imo, FUGIENDA sunt quaecunque systema debilitant, vel magis irritabile reddunt.

HINC vitandus est omnis cibi potusque excessus, qui plethoram generat, et, justam fluida inter ac solida rationem evertens, irritabilitatem auget; quique, ut superius observatum fuit, solidas corporis partes multum relaxat et debilitat.

PARI

PARI ratione, saepe laedunt et foci domestici, praesertim si grandiores sunt. Nihil aequè enervat ac calor diu continuatus : Atque hinc fit, ut, qui sese ignibus focariis multum assuefaciunt, frigori externo vix unquam committere possint corpora, quin leviora catarrhi symptomata, aliamve huiusmodi incommoditatem, inde percipiant. Si a vitae genere sedentario, corpus in debito caloris gradu conservari nequeat, satius erit, frigus additis vestimentis dissolvere, quam lignum super foco largiter reponendo. Ex utraque methodo sua sequuntur incommoda ; prior attamen, qua constantior conciliari potest caloris gradus, potior videtur, et apud plerosque Europae populos revera obtinet: Soli Britanni, propriis institutis plus justo dediti, morem nondum recepimus ; sed catarrhis, et rheumatismis, aliisque id genus morbis fere perpetuis, vexati, poenas pertinaciae debitas luere videmur.

FOCI in cubiculis accensi, quum prae aliis nocent, vitandi sunt.

HIC

Hic quoque memoranda sunt animi pathemata deprimentia, quae, nexu quodam inexplicabili, et in corpus effectus suos edunt. Hinc venus nimium culta duplici modo nocet.

2do, DANDA est opera ad totum systema corroborandum.

Huc imprimis conducunt haec tria :

a. Corpus modice exercere.

b. Balneo frigido uti.

c. Saepe sub dio versari.

a. *Corpus modice exercere.* Exercitationis effectus saluberrimos quis nescit ? Quid, fibris solidorum roborandis, magis idoneum ? Quid motibus fluidorum conservandis, secretionibusque promovendis, magis aptum ? Nec corpori tantum prodesse credendum est ; si ex animi oblectatione, vultuque hilari, ita colligere fas sit. Sed, utcunque hoc se habeat, de tonicis exercitii effectibus inter omnes convenit. Unum tantum, quominus in re utili erretur, hic monendum est ; nempe, quod citra fatigationem sistere oportet : Si enim ultra certum modum exercetur corpus,

pus, fequentur partium debilitas et atonia.

b. *Balneo frigido uti.* Quanti apud Graecos et Romanos haberentur lavationes frigidae, a poëtis medicisque paffim colligere eft. In medicina certe praeftantiffimum ducebantur remedium : Immo et fani eodem utebantur auxilio, quo corpora duriora ac firmiora redderent. Atque hoc eo magis veteribus cordi fuit, quod apud eos difciplina militaris, cujus ftudio optimus quifque civis flagrabat, fumum corporis robur neceffario exigeret.

Mos eft et apud Indos Americanos, fi auctoribus fides, nascentes ad flumina deferre, gelidâque quotidie immergere, quo militiae et venatus labores in agris montibusque incultis perferre apti fiant.

SED ex fola gentium bellicarum auctoritate, quantacunque jure cenfeatur, res nequaquam pendet. Ratione atque experientia compertum eft, balnei frigidi ufum, vafa omnia constringendo, fibris fimplicibus firmitatem, vivisque tenfionem debitam, conciliando,

D

liando,

liando, summopere ad corporis vires augendas conferre, plurimumque conducere ad homines e variis malis servandos, quae a subitis tempestatum variationibus originem ducunt.

c. *Saepe sub dio versari.* Memorabiles sunt consuetudinis effectus, et in corpus et in mentem humanam. Hac mira facultate, qua pollet natura humana, saepe inter morborum causas incolumes servamur. Hinc, qui tempestatum injuriis saepius obijciuntur, coelorum inclementiam impune ferunt; dum, qui jovi frigido sese credere timent, noxis inde ortis nunquam ferme immunes sunt. Illustre exemplum praebet pedum humectatio, qua, minus assuetis, nulla frequentior catarrhi causa; dum pueris, aliisque quibus a multo tempore in consuetudine est, nihil inde mali consequitur.

M E T H O D U S M E D E N D I.

Ex prioribus de morbi natura observatis, sequentes indicationes curativae sequi videntur.

I. DIATHESI phlogisticae occurrere.

II. FLUIDA, in membranam Schneiderianam conversa, aliorum determinare.

III. MUCUM blandiorem reddere, ejusque excretionem promovere.

AD primam indicationem satisfaciendam, adhibentur praecipue venaesectio et regimen antiphlogisticum.

Imo, QUANDO, vel sub morbi initio, vel in ejus decursu, magnopere saeviunt symptomata febrilia, et praesertim si respiratio fit difficilis, sanguinem, pro aegri aetate, viribus, et temperamento, mittere necesse erit. Sed leviora plerumque sunt symptomata quam ut tali egeant remedio. Atque haec sane evacuatio, saltem si saepius repetita fuerit, tantam inducit debilitatem, ne alia ejus

jus incommoda memorem, ut, si alio quovis modo propositam finem sine periculo persequi daretur, rarius eo confugerem.

2do, Regimine antiphlogistico, huic intentioni, satis certo ac multo tutius in plerisque hoc morbo laborantibus, satisfacere possumus. A victu itaque animali; a condimentis; liquoribus fermentatis, aliisque id genus stimulantibus, abstinere debet aeger. Imperandus est victus tenuis, blandus, lacte, puta, vel olera atque legumina. Multum hic profunt fructus maturi; grata enim aciditate sitim et calorem temperant: Facile quoque digeruntur, simulque, alvum leniter subducendo, et febrem generalem mitigant, et auctae fluidorum in membranam mucosam determinationi obviam eunt.

TALI regimini cedent, fere semper, inflammatoria morbi symptomata. Robustis, plethoricis, rigide observandum est: Ægris debilioribus regimen aliquanto lautius concedere oportet.

QUOD ad secundam indicationem attinet, danda est opera, ut, per omnes corporis partes,

tes, redeat circulatio aequabilis ; atque praecipue superficiem versus dirigenda sunt fluida.

HINC, adhibenda veniunt diaphoretica mitia, quae sine stimulo perspirationem liberam servant, lenemque superficiei madorem inducant, fluidis eo conversis.

EMETICA eidem favent intentioni, ex noto consensu cutim inter et ventriculum. Maxime arridet tartarus emeticus, in parvis dosibus, aliaque ex antimonio praeparata quae nauseam excitant.

NEQUAQUAM tamen propinanda sunt medicamenta volatilia calidiora ; utpote quae vel febrē acuunt, vel sudores profusos colliquantefque eliciunt, quibus, licet praesens malum levetur, quod et incertum est, franguntur tamen aegri vires, recidivisq̃ue via sternitur.

NEQUE in vehementiore caloris gradu continendus est aeger : In modico tantum tepore fervari debet, ad lenem diaphoresin promovendam.

QUIBUSDAM

QUIBUSDAM folenne eft, hunc morbum liquoris fpirituofi potione immodica folvere. Felicis inde eventus ne quidem defunt exempla. Res nihilominus periculi plena. Poculis enim largioribus, humorum circuitum accelerari, calorem augeri, aliaque febris fymptomata incitari et commoveri, necesse eft; quae omnia, ni fudor benignus brevi excipiat, aegrum inconfultum in vitae difcrimen conjicient.

Ex hac praxi, in temperamentis fanguineis, plus confequitur periculi; in frigidis atque phlegmaticis, minus: Sed, ne his quidem tuto ufurpari poteft, nifi febris leviffima.

PARI periculo feſe objiciunt, qui exercitio corporis vehementiore morbum folvere adgrediuntur, quod nonnulli fuadent. Multum tamen prodeſſe exercitationem modicam, dummodo abſit plethora, febrisque violentior, nequaquam inficias eo: Praecipue autem, praegreſſo morbi initio, quum jam receſſerit febris, et aeger colluvie ſeroſa obruitur, determinationem ad cutem leniter promovendo,

promovendo, effectus quam saluberrimos edit exercitium.

ALVUM laxantibus quoque, vel eorum loco injectionibus emollientibus, opus erit, si alvus adstricta. Profunt, fluidorum quantitatem minuendo, systematis tensionem levando, febremque, et nimiam fluidorum in partes affectas determinationem, reprimen-

PEDILUVIORUM etiam, ad hanc intentionem implendam, haud contemnendus est usus. Agunt, ut nonnulli credunt, a partibus superioribus derivando. Sed huic opinioni multa objici possunt. Ex vi relaxante, qua diaphoresi favent, melius forsan explicabitur eorum agendi modus.

EST et vesicantibus hic locus: Vi enim antispasmodica, qua pollent, circuitum aequabiliorem promovent; humoresque, fortasse, in loca quibus imponuntur convertendo, partes affectas eorum onere liberant. In catarrho senili plurimum profunt. Ubi coryza tantum laboratur, nihil opus est eorum auxilio.

TERTIA,

TERTIA, denique, indicatio, quae ad materiei excretæ indolem et copiam spectat, medicamentis demulcentibus, opiatis, atque expectorantibus, prosequenda est.

I. MEDICAMENTA demulcentia, blanda, quae fauces, laryngem, oesophagum, aliasque quas pertranseunt partes, lubricant, humorisve secreti particulas acres obducunt, irritationi minuendae optime inserviunt.

SUNT qui longe majores effectus talibus ascribunt medicamentis, quae in universa fluidorum mole mutationes quasdam inducere praedicant.

SENTENTIAM temere receptam, ut gravibus in arte viris videtur, hujus non est loci refellere; quum, utcunque se res habeat, nimium parce, in hoc morbo, his uti liceat remediis, quae ventriculo saepius officiunt, quam ut notabiliores inde effectus sperare detur.

PRÆ caeteris hic juvant, decoctum hordei, decoctum pectorale, gummi arabicum, gummi tragacantha, fago, falep, aliaque mucilaginosæ.

MULTO

MULTO minus placent oleosa, quibus multi in hoc morbo abutuntur: Talibus, scilicet, vel minori copia ingestis, onerantur organa digestionis, jam morbo fracta; ex quo necesse sequitur febris incrementum. Sola aridet Mistura oleosa, ex cujus usu modico nonnihil utilitatis percipi potest.

2. OPIATA, ad mucī tenuitatem et acrimoniam corrigendam, multum conferunt. Eorum ope, minuitur nimia partium sensibilitas; dumque inspissatur mucus, neutiquam impeditur ejus excretio. Sopita quoque irritatione, tussim, qua aeger perpetuo agitur, compescunt; simulque placidam conciliant quietem.

QUANDO autem gravior adest inflammatio, caute adgrediendus est eorum usus, nec nisi debitis evacuationibus praemissis: In casibus levioribus, maturius adhiberi potest eorum auxilium.

3. EXPECTORANTIBUS, denique, si opus fuerit, ut promoveatur mucī visceri excretio, praeter emetica, quae in hunc scopum

E maxime

maxime conducunt, radix scilla, parvis dosibus exhibita, multum prodest.

HUIUS quoque fini infervit gummi ammoniacum ; cuius tamen, prae vi sua stimulante, tutior est usus in temperamentis frigidis, quam in aegris junioribus, majorique irritabilitate praeditis.

EADEM observanda sunt de alkali caustico, cuius ope, ut dudum compertum est, facile solvitur mucus.

OMNIUM autem maxime juvat corporis exercitatio modica; hac enim fluidorum ac solidorum mutua intenditur actio, glandulisque relaxatis redit vis tonica, qua et cohibetur nimia secretio, et rejicitur colluvies mucosa.

F I N I S.